

晚晴移詩匯

晚晴簃詩匯卷十四目錄

申涵光 二十七首

張蓋 二十三首

趙湛 十一首

劉逢源 十九首

王餘佑 八首

張爾岐 六首

程先貞 五首

劉文炤 十首

杜依中 五首

李友太 二首

孫望雅 一首

孫博雅 一首

傅眉 四首

董樵 四首

李雍熙 三首

王星室 一首

韓田 一首

白孕彩 三首

王建常 一首

趙士喆 四首

張光啟 四首

焦復亨 一首

王體健一首

高鑄二首

晚晴移詩匯卷十四

徐世昌

中涵光字孚孟一字和孟號鳧盟永年人貢生有聰山

詩集

張素存云君自髫髻卽嗜爲詩吐納百氏不名一家而音節頓挫沈鬱激昂一以少陵爲師其所以師少陵者悲愉吽嘯無一曲肖而非世俗撥拾字句以求形似者所可比也魏石生云鳧盟之於詩一以少陵爲宗而沐浴於高岑王孟若李空同何大復亦兼采所長其他兢如也詩話鳧盟性簡傲以詩名河朔間嘗游蘇門以弟子禮謁夏峯獲聞天人性命之旨遂不復爲詩漁洋懷人絕句廣平申大今詞傑未識容顏眼便青遠寄新詩向隋苑懷人偏在竹西亭

歲晏

歲晏百物息草木隨風沙松柏慘不舒况彼園中花層陰
晝蕭條微霰時復加林中常鳴狐屋上常鳴鴉豈不思遠

游負手還咨嗟陽氣動飛灰枯荻漸萌芽嚴威蘊華滋深
藏古所嘉

荆吳隔大江風濤不可涉短衣凌荒岑挂漿撥寒月元雲
閉河梁故人書久絕日招誰家兒輕揚弄綺陌投我蛺蝶
羅繫以雙玉玦我畏不敢過中途自改轍弱草披澗陰梧
桐峙高闕本非同根生榮瘁應各別

亭亭西山雲萬仞青芙蓉下臨不測淵土有太古松松頂
巢黃鶴淵中藏蛟龍躡屐披雲根亂石翳薊茸隔溪三五
人濯足吟疏風白髮好容顏無乃商山翁漢庭亦已出書
幣凋清蒙眞隱自草木豈貪世上功落日凌紫煙揮手吾
焉從

匡廬吟問李饒州志清

汝從江右返正當秋雁分幾時離卻鄱陽水衣裘尙帶匡
山雲我聞匡山天下絕飛泉百丈吹瓊雪香鑪五老沒層
雲影入波濤峯勢折聞有陸羽井又有遠公臺李白讀書
心所好至今魂魄應常來我曾東入吳揚帆下西浙楊子
太湖水滿眼吳山北固皆邱垤十載匡廬幽夢結西江血
滿鄱湖熱兵戈遙隔子猷船汝若曾登可細說

邯鄲行

西風吹落葉颯颯邯鄲道邯鄲兵火後人家生白草我聞
邯鄲全盛時朱樓銀燭光琉璃趙女臨窗調寶瑟樓前走
馬黃金羈卽今富貴皆安在惟有西山青不改不見游俠
子白日報讐飲都市亦不見墟邊倡華袿鳳髻明月璫舊
城寥落荆榛裏樓臺粉黛皆茫茫城邊過客飛黃土城上

憑臨日正午照眉池畔落寒鴉不信此地曾歌舞探穀沙
邱去不迴霸圖消歇更堪哀邯鄲之人思舊德至今猶上
武靈臺

春雪歌

北風昨夜吹林莽雪片朝飛大如掌南園老梅凍不開飢
烏啄落青苔上破屋寒多午未餐擁衾對雪空長歎去歲
雨頻禾爛死冰消委巷生波瀾吳楚井乾江底坼北方翻
作蛟龍宅豪客椎牛晝殺人彎弓笑入長安陌長安畫閣
壓璚瑜獵罷高懸金僕姑歌聲入夜華鐙暝不信人間有
餓夫

張覆興自西山來

何事須城郭人間復見君全家依澗草短褐帶山雲薄俗

居難定忘形鹿可羣四方多戰伐羨爾未全聞

遣興

豈敢名高尚山園已定居數椽風雨外萬事死生餘避地
尋丹訣傳家有素書天寒松酒熟日日漚樵漁
小築容高卧荒林失曙更人從多難老心向遠天清野屋
懸魚笱霜灘落雁聲一年看又暮新月幾迴明

謁張尙書湛虛先生

結茅飛鳥上秋色滿懸壺白髮增幽事黃冠屈壯圖琴樽
山月好風雨老臣孤莫訝披雲至浮名此地無

不忘

江上前朝酒同人意不忘衣冠臨水榭煙雨下金閭入簞
龍鬚輒登盤佛手香歸來南北異生死各茫茫

旅食多歸夢庭幃正北懸重來輕齒髮千里入烽煙書畫
江城市弓刀塞草天至今明月夜無地拜啼鵲

雨後林慮道中早行

曉渡青泥坂秋花亂馬蹄不知山寺近漸覺遠村低萬事
驚鼙鼓孤雲入杖藜蘇門高卧處爲訪碧峯西

寶雞巷訪吳見末比部卽訂九日之游

卜宅依寒水朝回只閉關見君當落葉此地有空山雨歇
秋仍暝官貧老更閒登高何處好屨杖許追攀

登岱

殿閣盤空界鐙香出絳霄到門諸念絕終夜百靈朝石闕
馴雙虎天風落皂鵬玉漿如可待未覺沃州遙

西郊

風吹荻葉滿漁梁野菊乘秋亦暫香
邊郡早寒沙漠漠水村多雨月蒼蒼
常持白羽尋雲壑敢羨華裾負草堂
何事暗蛩催鬢髮一年今已過重陽

寄宋吏部玉叔

風雨常懷宋玉悲嶽雲海樹遠離離
春生太液魚龍嘯月滿空陂雁鷺飢
先輩風流成李賀同時歌詠附王維
定知脫畧能傾倒竹杖從爲汗漫期

無才

窗下平田細路分樵歌幾處遠猶聞
濤聲夜落漳南樹山色晴分冀北雲
曲岸人家依紫蓼衡門客到煮青芹
無才合就窮途老車馬休驚白鷺羣

己丑生日

行歌何處問幽棲
溢口孤亭郡堞西
漸覺悲歡從俗懶
漫將懷抱向人低
驚猿莫訝頻移樹
羸馬猶能惜障泥
烽火近連冬未雪
每逢喧樂倍淒淒

靈巖寺

天畔靈巖已昔聞
石橋花雨正紛紛
楓林亂掩浮圖出
黛色遙從泰嶽分
古殿橫闌迷赤箭
秋泉帶葉下青雲
伊蒲會罷僧厨飯
倚杖看碑到日曛

雲外笙簧擁碧霞
游人爭看鐵袈裟
虛巖白映山南日
老菊黃垂洞口花
溪水過橋喧鶴鶴
松根出石走龍蛇
飛梯萬仞棲真地
可許尋源問鹿車

答人

日日秋陰命笋輿
故人天上落雙魚
荷花未老村醪熟
爲

道無閒作報書

黃花谷

竹杖尋源入上方滿山榭葉晚蒼蒼亂碑零落游人少一
道飛泉下夕陽

溪上

微霜昨夜下庭槐水畔閒登萬里臺兩岸蘆花飛白雪午
橋煙裏一舟來

燕京卽事

塞雲宮月遠蒼蒼蕭后妝樓亦渺茫四百餘年池水換依
然風動芰荷香

漢時秦原罷曉鐘黃綃牙軸市塵封畫圖往往多隆準傳
是先朝舊御容

汎舟明湖

女牆倒影下寒空
樹杪飛橋渡遠虹
歷下人家十萬戶
秋來俱在雁聲中

張蓋字覆輿永年人明諸生有張子詩選

詩話覆輿晚年遭逢國變自閉土室中雖妻子不得見以詩歌唱和爲樂朱竹垞銘其墓云處士爲詩哀憤過情恆自毀其稟或作狂草累百過至不可辨識乃已久之狂益甚竟死申晁盟輯其遺藁僅得百篇刻之五言尤高簡

寄李十三郎君

主人十三齡天駒見龍脊絕塵瀟灑姿能解留人客予時至平千復著游山屐足繭澀登途盜賊況充斥踟躕數里間落日藏光赤投宿上君堂張燈照昏夕蹇驢足芻茭老病須燔炙奴僕亦殷勤自來掃牀席酌酒須玉瓶傾光泛

琥珀感情欲痛飲所恨胸腸窄恭聞爾先人遺汝登朝舄
汝兄善草聖海內稱名碩汝才駕徐陵準擬文章伯予有
兩男兒雞鶩空毛翮大兒倍汝年弧矢未能射小兒少汝
年祇備樵蘇役何以汝聰明日夜親圖籍老夫若汝年走
馬垂楊陌有時叢臺下醉舞揮金戟中歲好彈琴素琴橫
白石旁植一枝松今已高千尺忽忽鬢髮蒼自顧無良策
何處可容身避地來山澤結交無老少遭時有順逆長嘯
望停雲題詩謝疇昔

廣羊山訪殷伯巖不遇

爾從南方來衣裘帶江色舍舟入故山倦游聊憩息我住
君山南君住吾山北相隔十里雲欲見何由得今晨動幽
興獨訪漆泉側危橋上古寺徑轉長松直山僧五六人亭

午會法食清齋到鄙夫益我筋生力老翁氣忽壯果腹取
巖巔初瞻意律罕絕頂無難陟捫蘿纔躋攀寸步成匍匐
天畔石房古仰望不可極山叟何時還再欲窺堂闕三步
一回頭皓鶴煙中翼

昭明臺呈襄陽諸公

楚郡蟠江腹危樓逼太清窗通高鳥過檻俯白雲生帝子
留文字羣公列治平我來戎馬際登眺獨含情

留郝元直

自得黃溝信常懷見汝期只愁相會少可道故鄉遲陪酒
鄰家夜彈棋日落時明朝各有事分手卽天涯

秋興

兔嶺邛雲外羊祠楚甸中鄉心堪夜雨旅病苦秋風湖橘

垂丹實江蕉卷綠叢幽姿不可見倚樹獨書空

殷伯巖招同白涵三郝元直苑西柳霍亮雅申鳧盟
劉資深集飲

屢宿陶潛宅今來得數公竹斜鐙影外人醉雨聲中老惜
歡娛異交緣出處同病軀先就榻應恕鹿皮翁

渡沁水宿穆陵關

斜陽明晚渡倦馬踏寒雲岸動移舟影沙喧落雁羣山城
秋似畫水市暮多聞老客歸心急無眠到夜分

客歸

水濶荆門路君從此地歸雲山開暮雨舟檣帶斜暉計日
程將近從人道已非且尋嵇阮去竹裏閉柴扉

山居張湛虛司馬枉駕山人以予壺餐不備爲展待

因要遂臣先輩

康樂游山信先期報敝廬宿春供野飯晨掃淨荒廚徑仄
猿相引雲深虎伴居果來尋牧子眞氣拂林墟

山翁亦有意招引過鄰家繫馬驚林鳥催厨饌野麕一鐙
先好月雜果間疎花甕有蒲萄酒村醪不用賒

月出樓陰靜天晴露氣微蛩聲斷復響螢火起還飛隱吏
遺朱紱山光上白衣清談忘夜永相對兩無違

憶舊

城晚砧聲急庭深樹影寒孤檠憐自照明月憶同看旅日
憑詩過鄉愁仗酒寬秋天饒夢寐夜夜渡江干

山居秋夜同友人坐月

客宿楞伽宮秋深白露中雲歸千澗滿月出萬山空兵甲

何時息琴尊此夜同張華有寶劍醉拔舞雌雄

谿村卽事

罨靄樹中行潺湲石瀨清野花開間色秋鳥落寒聲家住
愚公谷書傳老伏生鄰人自來往日見不知名

偶成似湛虛先生

久客成親故居人識漸多自知林下路數向水邊過夕露
凋蒲柳秋風老芰荷病中曾見問詩思近如何

喜郭楚玉至

五載一相見乾坤幾變更亂離驚汝在衰病惜人情齒髮
前朝貌丹青後世名談詩悲喜外好雨向簷傾

登海光樓

城遠隨山勢樓高見海光池霜冬夏白岸樹古今蒼讓國

懷虞帝征苗憶禹王浮雲看變態倚檻獨徬徨

聞張扶隆將歸

詞客南遊未遣知遙傳消息倍多思江濤赴壑吹沙急海
日含山出霧遲桂檝尙留桃葉渡松醪已負菊花期陶潛
近有歸來興待汝從容一問之

寄題申處士鳧盟箕亭

負郭田疇水氣中隱君亭榭白雲通青連秔稻千村雨香
泛芙蓉萬里風夏簟涼侵高士卧新詩清絕老夫同欲持
百尺琅玕竹向爾漁磯作釣翁

答申鳧盟約遊隆慮

西南林壑動高興愛有山村間水村山入太行盤鳥道水
分瀑布下雲根得同鄭子耕巖谷何異龐公隱鹿門仗汝

遠尋先卜築願將白髮共朝昏

七里峽

朝下縣壺頂暮行寒峽中壺形猶迤邐峽勢已龍提豈假
隨刊力當知造化功水聲流太古石色聳遙空重碧涵砂
礫深紅綴蘚叢暗崖迴北雪高岫阻南風山鬼宜幽僻神
魚老混濛依稀聞唳鶴彷彿見奔猱聞道瞿塘好常思灩
澦雄干戈妨歷覽舟楫廢疲癯此谷聊堪隱前山幸可通
杖藜五指外借騎廣陽東附葛緣明月披煙坐晚楓回瞻
長嘯處何異在崆峒

漫作

玉盤漬墨可二斗高麗繭紙冰蠶紋醉來揮灑興不盡欲
上青天寫白雲

孟亭

不見當年孟浩然魚梁渡口問漁船巖扉松徑空搔首沙岸如霜月滿天

趙湛字秋水號石鵠永年人有玉暉堂橐

詩話漁洋謂申鳧盟稱詩廣平開河朔詩派其友雞澤殷岳伯巖永年張蓋覆輿曲周劉逢源津逮邯鄲趙湛秋水皆逸民也案秋水實永年人非邯鄲漁洋蓋誤記詩清園朗潤與津逮詩相伯仲

省心吟

玉函藏寶鏡光瑩若冰晶三時不拂拭便見雲煙生撫躬問方寸百歲空營營五色亂我目六欲牽我情苟不自琢磨安得常清明芳槩接前哲黽勉崇令名

博陸傾漢冊偉績方伊周不學慕厚勢帷闥生愆尤豈有廝養兒束髮皆封侯台光一夕沈樓觀成榛邱今古理不

遠慎以道自謀

上蔡有鄙夫困窮羨倉鼠挾策干祖龍感激去鄉里抵掌
取卿相乃欲易天子所謀一不臧凋零自茲始東門悔初
念機發不可止

溫清理亦常閔曾號佳嗣百行此其源立身首孝弟茲義
苟不充浮名盡糠粃試問平生心胡爲皆昧昧

曉登關山望六合有懷黃遜庵明府

山口掛殘月樹色曉青蒼登危陟層坂歷險凌崇岡力衰
五步歇僕夫相扶將下瞰同旅人偃偻行趨踰顧余頭白
翁驅策游何方故人有黃子綰綬宰江鄉疇昔枉尺書走
使過沼潭溫語慰衰朽冰雪灑肝腸吾里值歲儉盡室無
宿糧老妻裙不完稚子充糟糠苦被入口累奔迫道阻長

黃子敦古處不與俗士行車笠有前期久要應不忘

贈太平馬學博

名山不在高名泉不在深所貴清冷色玩之怡我心之子
山川秀冲懷寄遙岑六十困寒甌白首無知音丹室偶然
遇蘭雪生我襟高話對微雨如聽松間琴契合各有數傾
蓋比黃金

我友殷宗山疇昔宰灘水式廬得澹臺佩之等衡芷分手
三十秋逝波去若駛垂老感知遇淚下不能止流水與高
山古人復可起

貽我白雪篇蒼茫發瑤采傲若松與柏雪霜色無改捧讀
不忍釋浩淼望滄海緘之玉函中披閱對吉靄旦暮秋江
濱芙蓉共君採

武勝關

草店亂山口巖深隔暮曛
皇圖三楚盡列宿九何分
控遠容巴寇關貧減戍軍
秋風南羽便寄謝洞庭雲

道經鳳陽

飛樓縹渺海雲孤
山頂星壇定有無
不信青田占氣象
還教赤縣變荒蕪
瑤臺歸鶴悲遼水
玉寢啼鵲拜鼎湖
聞說梵宮遺寶衲
月明珠樹少棲烏

訪張天池兼訊楊觀察筠湄

裴子巖邊新卜居
六年烽火斷音書
相逢應訝形容老
失路真慚義氣疏
戰伐何方尋樂土
饑荒吾里漸邱墟
峴山若遇羊開府
憶否漳南舊隱廬

劉逢源字資深號津逮曲周人貢生有積書巖詩學迂

軒橐

詩話津逮與申鳬盟諸人唱和時稱高士其詩功力頗深品格在大歷之間

雨餘

雨餘一杖輕林塘引秋步溪漲石梁平別尋花間路徑轉
岸稍顚邱壑莽回互奇石擁秋花寒苔蝕古樹孤亭不逢
人偶得閒中句石磴久徘徊林外山光暮

九日登赤壁

九日至黃州欣然獨西笑赤壁落吾手於焉恣游眺一杖
陵層崖劃然發長嘯把酒呼魚龍踞石登虎豹小亭遺像
在長髯側烏帽卓哉東坡叟煜煜神光照羣兒戲弄兵蟻
鬪何足道想公弔古心還爲後人弔鶴影落寒空笛聲來
遠棹杖策下荒岑江煙起漁竈

詠懷

少年不自量意氣何崢嶸思一吐奇懷歷抵漢公卿中歲
事乖違烽煙暗兩京遂戢飛揚志殊深林壑情家貧迫衣
食不敢薄躬耕頽然一野老井曰困柴荆每赴雞豚社閒
尋鷗鷺盟陋巷甘偃蹇聊以善自名

溪光

溪光明落日淡性與秋宜叢菊薰幽徑寒匏掛短籬泉聲
爭赴壑葉影半辭枝鄰叟閒相慰浮生莫浪悲

秋村卽事

夜來山雨過寒氣入秋衾野水多歸壑林禽有靜音簞瓢
無外慕鷗鷺識閒心久矣甘雲卧浮生任陸沈

訪友

子雲塵外宅花底出炊煙旋摘簷前果還烹雨後泉雞豚
侵虎落鷗鷺上漁船戰伐何曾見桃源又一天

村居秋懷卽事

空山寂寞野人家巷古溪深靜不譁屋角老槐飛敗葉庭
中寒蔓引秋瓜霏微菊畔茶煙冷宛轉橋頭竹徑斜晚有
鄰翁雞黍約一尊溪上醉秋霞

無端華髮滿秋簪四壁雲山響素琴何處寒花矜晚節幾
年風雨老文心香來始覺蘭當戶月到方知鶴在林杖履
荒原覓天地一溪松影隔雲岑

和秋水韻

自甘抱拙守東岡一卧雲林歲月長野水到門晴放棹博
山欹枕夜焚香松聲無賴驚幽夢花影多情戀夕陽牢落

壯心消欲盡愛聽童穉詠滄浪

己亥冬懷

寒裂冰紋響石渠滿天風雪困樵漁藏名何必逃吳市高
卧猶能讀漢書已向琴尊消歲月無勞鐘鼓饗爰居茅齋
土銼炊煙冷委巷誰來長者車

短髮

短髮蕭蕭不受簪每思方外散幽襟行藏何必關人世歲
月無多閱古今秋漲有時侵舊路白雲常自滿荒岑浮名
不願傳都市肯向長安痕碎琴

薊門秋興

微霜昨夜下邊城小隊輕裝獵晚晴箭似餓鴟雙翼墮石
疑伏虎一軍驚桃花馬飾黃金勒竹葉醪傾白玉觥醉尉

霸亭誰敢問夜深鼙帳打毬聲

無復熊羆守翠微行人駐馬立斜暉人間已見傳金碗篋裏徒驚舉玉衣雁掠荒雲啼隧道鼠緣古瓦下園扉經途誰奏通天表淚溼龍髯願已違

秋日漫興

稍喜世緣貧日少何妨邱壑寄餘生漁樵堪作閒中計雞黍聊尋世外盟兩岸蓼花晴放棹一龕蕉雨夜譚兵牀頭龍劍時時吼五嶽胸中似未平

別墅留僧夜話

竹杖芒屨筍簪冠籬頭缺處望煙巒半生可惜貧中老萬事何當悟後看瓶粟無多憂鶴瘦春衣初試怯花寒無心收拾閒風月煨芋焚香對懶殘

郭泰

博帶雍容七尺身
遨遊郡國擅人倫
如何下士驚相慕
只倣先生折角巾

种放

賢母相將老一邱
石田茅屋豹林秋
昭文司諫新銜貴
爭似雲溪老醉侯

補鍋匠

高隱昔傳磨鏡客
奇蹤今見補鍋人
若將姓字留天地
雖作巢由亦外臣

山行

寂歷空山鹿豕蹤
石梁苔滑杖孤筇
岸花零落隨流去
秋到溪南第幾峯

王餘佑字介祺一字申之直隸新城人明諸生有五公

山人集

詩話五公山人尚氣節好談兵著有乾坤大略諸葛陣圖諸書受業於孫夏峯杜紫峯之門入國朝流寓獻縣主講獻陵書院與及門論詩謂詩本性情必以忠孝爲根抵子美入蜀子瞻海外忠君愛國之念肫然於中觸景流連遂爲詠歌嗟歎不已此蓋自道其意然詩亦多端其佳處不盡在此觀杜蘇全集自見山人本不以詩重四庫書目提要謂其詩文皆不入格考證尤疏山人蓋自有其卓卓足傳者實不以此與文人較短長也

雪後寄田治埏

冬深白雪寒山遠烏薪貴伊人寂不聞得無折膠畏凍雀
棲僵枝寒兔蹲蒼卉萬物正枯槁嶺梅獨香沸所以天地
心剝盡復當暨寄語拈花人笑閱嚴凝氣

步答魏澹園

平生豪宕意白髮作閒人倚馬心猶壯屠龍技已貧酒杯妨病眼詩卷累餘身勗我眞良藥躊躇動遠神

用寄陳藹公韻示文輔

後世人難問先憂計總疏已淪中下策空負短長書交自分今古吾誰問毀譽壯心看漸冷且共老江漁

弔朱貞明

一生俠烈氣熱血沸重泉力屈空填海魂歸欲叫天淒風悲馬鬣苦月冷漁船蘆荻蕭蕭處誰憑義士阡

過立節弔袁紫煙將軍

一世英雄氣蕭條何處歸龍精埋地血馬革緇台衣空憶頻陽卧難籌卽墨圍遙憑宿草墓雨淚不勝揮

偶句足成有懷山中諸友

雲樹千層水一灣幽人此際好閒閒釣磯坐去攜殘卷樵
斧腰來耐遠山甯子不離牛口下石生何事馬蹄閒總無
長統良田樂邱壑生涯足閉關

偶感

三徑荒蕪豈邃居鳥巢魚窟更安如逢人只合長緘口避
客終當諱讀書船入竹中聊斷問蘭生道上亦妨鋤從今
玩世休希阮一唱猖狂計尙疏

偶感

春來萬木綠芳齊多少遊人聽鳥啼可惜城南紅杏發無
人載酒上唐隄

張爾岐字稷若號蒿庵濟陽人諸生有蒿庵詩集

詩話崇德中師徇山左稷若尊人殉焉稷若殫心撰
學撰儀禮鄭注句讀根本儒先立言簡當旁及夏小

正弟子職老子諸書皆有注釋沈倫諸生間爲王裒
不爲嵇紹終不欲自明亭林推爲獨精三禮卓然經
師其歿又爲詩弔之曰從此山東問
三禮康成家法竟無傳其重之至矣

壬寅春訪元明先生張隱君歸賦

繡水雲湖間距城近十里爰有石隱人誅茅託於此我欲
訪幽蹤披衣凌晨起徐步乘春風雲樹互迤邐道旁問耕
夫云此草廬是榆柳翳柴扉竹石森階瓦斯須先生出白
髮短覆耳骨齠更神完古意見冠被詢名各嗟訝入坐略
諧唯烹茗發清言紛綸具元理夕陽在樹杪欲去情不已
揮手尋歸途蒼茫暝色裏

列仙詩

紫庭夜降玉晨君面授靈威鳥跡文指示分明方悟得嵇
康未是解書人

一顆冰桃落漢家
羣仙爭妬錦宮霞
當時不信元君詔
今日東風正著花

漢宮衰草夕陽寒
淚滴銅人久不乾
舉手摩挲相慰語
海漚生滅本漫漫

注老爭傳河上公
文皇虛訪擬空同
乘雲瞥地呈靈幻
何怪文成與少翁

送張非聞還里

生世苦違異退守詩書殘
寥寥古人中默求心所安
出語遭疑訕孤蹤良獨難
吾兄自逆旅坦然委肺肝
片言質要妙曲折頗有端
視君方寄食殊不憂飢寒
冥獲或自笑心戰亦寡歡
內勝足天機身窮中愈寬
時月一過從開襟意爲殫
慮余搖異說發藥相劇鑽
往往切余心慚汗同露漙

白璧陳座席自覺多垢癥相資八年餘如鏡正衣冠忽聞
當別去朝夕越河干北堂有慈命於理難盤桓惜此良友
遠致詞不覺繁願各勵終始莫變青與丹

程先貞字正夫德州人有海右陳人集

詩話正夫以大父蔭爲水曹郎方強仕卽謝歸明亡
不復出詩汲古起雅爲牧齋所稱詩家表章節烈爲
五言長篇孔雀東南已成科曰正夫火蓮一篇
聲調句格初不墨守舊蹊漁洋謂有逸氣信然

火蓮行

陵州有節婦阿桂身姓王厥父名會禮髫年訓義方出嫁
韓承業青衿白面郎伉儷如膠漆自比雙鴛鴦刺繡春宵
暝辟繡秋夜涼井臼躬操作顏色奉姑嫜名滿鄰人口賢
哉窈窕娘承業向彌留手自撫靈牀好往不須怖死者實
甯康平生託寸心賤妾敢遺忘不久卽追晤與君相扶將

既暝一長慟七日絕水漿阿母勸之食未忍負高堂終不御鹽醢朝夕惟淡湯開我東閣倒篋復傾篋珍珠雜翡翠羅列錦雲裳分遺諸妯娒庶幾永相望依依守素施三餐薦旨香卻略再拜跪齊眉進酒觴皈心佛位下喃喃達五更或憫其愁苦或笑其癡狂夫人都不知塞耳去洋洋在苒日復月朽骨宜歸藏計期已迫促夜起辦嚴裝竹釵麻作屨斬袞稱體量懷探尺素書置在案中央擬題曰守志斐然成篇章明鏡壓其上雙珠分兩旁出至室東隅露地承天光藉用舊蘆席趺坐委經纓揮手謝家人不得作驚惶屏氣靜俟之須臾烈火張自頂下及踵紅雲映寶妝體如玉璫瓏較比金鐵剛小院滿氤氲煙焰殊馥芳衣服既淨盡蘆席乃不傷相界若蓮花又若觸琳瑯觀者千萬

眾稠疊成堵牆太守從南來五馬立徬徨亦有衛司馬牙
纛豎旗槍低頭各歎息創創救其喪火蓮席下土爭取療
災殃土到病卽愈此窟如池塘乃翁韓紳氏收骨入幽房
雙柩遂齊發合葬城東岡神宗戊子歲距今八十霜間從
好事者鄴架理縹緲得其手書讀纒纒萬言長非偈亦非
詩敘次頗周詳大抵謂吾心出入本何常一獲卽須鎖不
可使之颺幸無兒女累年已三十強信爲萬行母聊用挽
頽綱斯言類有道敢不拜其昌人生娶此妻何必貴姬姜
高冢今猶在連理樹成行魂兮風雨夜髣髴歸故鄉

顧亭林從大同來暫過東昌

一夕三年別疎鐙話舊游長征還帶劍遠望欲登樓月落
青山夜雲迴紫塞秋故鄉何處是此地卽并州

吾道看如此天涯去住難班荆留款坐翦韭勸加餐暮雨吟蛩切秋風落雁寒仲連臺畔路明日又漫漫

還山

豈有移文向北山孤飛倦鳥自知還遠慚宏景無仙骨真覺維摩有病顏隱士新銜聊可署狂奴故態不須刪朝衫脫後身加健別有高堂舞袖嫻

送舍弟典返東蒙別業

蹇驢秋盡度荒原東下潁臾有舊村流水斜通樵徑遠寒山萬木一柴門

劉文昭字雪舫宛平人有攬蔥堂偶存

詩話雪舫明孝純劉太后姪史稱太后家本海州後籍宛平魏叔子有贈北平劉雪舫序其爲宛平人無疑靜志居詩話謂爲任邱人誤也叔子稱其好學工詩其人燕有燕游草悲涼伉壯不忍多讀全集不可

見畿輔詩傳僅載其此律
十首蒼涼沈鬱不減李何

金陵懷古

天涯旅况又逢冬薄暮江風慘客容
南渡君臣終遜位東流波浪自朝宗
干戈滿眼人將老喪亂經心酒不濃
聞說樓船催伐木何堪斧及六朝松

霜草芒屨訪舊京景陽回首淚縱橫
埋金未必成秦厭銷鐵安能禦晉兵
自古山川難恃險從來花鳥易傷情
南朝過眼繁華盡倚杖長干看月明

客懷

建業荒城王氣銷逃名何地寄漁樵
干戈夢裏懷三徑刀尺聲中過六朝
舊雨不來江路晚歸鴻信斷楚山遙
孤鐙此際堪愁絕獨立寒空夜寂寥

登雨花臺

黃葉蕭蕭眼倦開，北風吹客上高臺。
千秋王氣朝雲散，萬里邊聲塞雁來。
舊苑荒榛多牧馬，青山落日獨銜杯。
不須更下新亭淚，晉代園陵已劫灰。

同魏爾阜蔣前民登焦山

連朝阻雨瓜洲宿，雨霽同君共涉江。
寒影一樓風色厲，驚濤兩岸客心降。
懸崖樹老根全拔，廢苑鐘銷僧不撞。
洞口至今留漢詔，高蹤千載歎無雙。

稽山客懷

江東風景近如何，十里錢塘倚棹過。
白髮每從愁裏盡，青山偏是客中多。
攢宮草沒冬青死，禹廟碑傾古字磨。
獨有若耶溪畔女，秋來猶唱舊吳歌。

泗州道上

極目離離土一邱
漢皇陵廟此山頭
宮雲有意終朝變
淮水無情逐夜流
湯沐昔年曾賜復
禾麻今日不完秋
疲驢踏遍殘陽外
煙樹蕭蕭動客愁

清河夜泊

孤舟離緒又清明
一挂蒲帆千里程
去住向誰商出處
飄零到我負生平
雲連海氣天無色
風鼓河流夜有聲
襆被春寒眠不穩
悽然雙淚落三更

大悲寺逢僧謝監

我來古寺暗銷魂
瓦礫盈階一徑存
僅有爐煙凝白晝
絕無鐘鼓課黃昏
顏垣雨洗毘盧面
蔓草塵封方丈門
老監逢人蕭索盡
殷勤垂淚話開元

一自居庸賊騎來禁城宮闕望烽開侍中早棄司農印監
視原非戡亂才傳詔亦曾趨暖殿佩刀無計禦平臺如今
頭白何人問風雨柴門永夜哀

杜依中字遜公號致虛靜海人明諸生順治間以宿儒
高行薦不應有雨花詩集

詩話遜公當崇禎間獻十七策懷宗歎異署紙尾
曰賈陸重生以此名震天下熊次侯謂遜公不獨以
詩名余造其廬輒作隆中之想吳次尾
曰讀遜公詩知北地之才不獨崑崙峒也

遊華藏菴

百年塵劫裏過眼一風燈解脫人皆佛清閒我亦僧升沈
原有故夢覺果何憑借得蒲團力消磨障幾層

舟次河北自飲

好月隨舟轉相看醉影斜雄心非藉酒清淚豈聞笳城廢

連年水民荒何處家同人各努力莫待鬢毛華

偶成

窮有千年恨詩無一字工心存生死外身老亂離中劍氣
冲星動琴聲帶月空交游零落盡賴得夢魂通

夏日村居

今古紛紜未易評松間石上暫移情驅愁任我排棊陣破
恨同人共酒兵新法已經殘海內情談自是誤蒼生近來
司馬多征戰曾否當年細柳營

和黃石齋

一片荒涼萬里沙詩書誰是鄴侯家空知民困黃河急愁
看天文北斗斜雲暗深山龍喚雨香來古寺鹿銜花當前
過去渾如夢半榻松風聽法華

李友太字仲白號大拙天津人

詩話仲白常鼎革時年甫十三自號逸民隱於黃冠性迂介以禮自繩跬步不苟顧嗜古若癖凡篆籀分隸碑碣鼎彝書畫之屬一見能別其真贋摩挲品題終日不去手工畫詩亦雋逸可喜

賞花作

化工生一花結構殊苦辛自跌到須臾累積窮微塵譬之人百骸闕一非完人一朝顏色萎墮落吹續紛生之必一年敗之無半旬我故特愛惜以答造化勤換花試改插又是花一身

讀書弔古人我不能問字著書贈後人我不能執藝徬徨兩處心寂寞一生志不如來飲酒看花百日醉一花纔爛慢俗眼便驚異那知後花榮初花積憔悴人人作佳傳竹書不勝記人人要易名柳下不勝諡花亦猶人耳久開不

如墜

孫望雅字君儼號臞仙容城人有得閒人集

詩話臞仙夏峯
子詩多作理語

辭墓

中車頻促去他鄉臨路悽其拜墓傍我奉嚴親天外去諸
孫應解辦蒸嘗

孫博雅字君僑輝縣人有約齋集

詩話君僑夏峯第四子事母至孝夏峯春秋高偕兄弟朝夕侍夜卽卧榻前未嘗少離夏峯晚年重聽弟子問難藉君僑以達既卒居喪盡禮弟韻雅坐事繫刑部獄君僑往來省視閱四年獄未解竟以勞瘁卒

白雲莊懷前御史溫源

漳南才士共知聞話到當年涕淚殷解綬懶聽西掖漏浮
家愛種北山雲牀頭金盡仍留客笛裏聲悲忽憶君最是

荒園能觸恨獨吟遺句弔斜廬

傅眉字壽髦陽曲人有我詩豪

詩話壽髦青主子青主抗節不出壽髦躬耕以養青
主喜苦酒號老樂禪壽髦因號小樂禪青主出游令
壽髦將車夜宿村店篝燈讀書旦必成誦乃行詩附
霜紅龕集後青主舉鴻博堅卧不入試時壽髦已前
矣

雜詠

驚馬喜在後惡馬喜在先惡馬當用轡驚馬當用鞭燕雀
起道傍驚駘不肯前狡憤復喘汗盡日勞鞍韉良馬心膽
定千里咫尺間飢不食惡草渴不飲濁泉被甲盤蟻封注
波帶囊韉主人苟卓犖筋骨安足憐鐵騎滿原野一匹攻
中堅旌旗爲之靡壘壁隨周旋斬得大將頭戰鼓聲闐闐
沙場塵土歇雄心仍九邊

秋色

秋色在村外柴門久汨沒邱壑雲無窮半晴山雨歇木葉
填風煙雁底見微月寒蕪碁枰疏草蟲因閒發

崛崛山寺門外

頽坐不暇語第取酒盞斟神氣稍爲接幽悅與我尋側睇
寺西巖厯落紅來禽高松蔽晴日薄雨蒙深林松身時反
側透亮見日沉飄渺卷紫縠飛傾融青金綠霧忽然過西
南留一岑當其希微間遂能合冥心

燕

春風吹斷紫蒲茸銜入盧家畫閣中只許游絲飛院落不
容柳絮近簾櫳奈何蛺蝶彈輕粉忽略桃花撲老紅收拾
香泥勞苦罷鏡臺偷照玉蟠龍

董樵初名震起字鷲谷號東湖萊陽人有南游岱游賈

游入山燕臺還山耦耕堂諸詩

詩話東湖雅志林泉慕古人採薪牧豕因更其名并以爲字亂後居文登海濱日荷薪入市易米不使人知其居處後與趙伯濟同隱成山姜如須顏其廬曰耦耕堂

還山至雲門

煙覆平林霜樹紅羣山中豁曲溪通園蔬已見連荒草籬菊還應炫晚叢一蹇江山新句在三秋風雨敞廬空倦游漸識閒居好試拂塵衣倚碧桐

初春過宋伊水次見贈韻

五嶽終難竟蹉跎豈漫游家居如旅夢春雨似深秋樽冷山雲外潮寒島石頭與君忘世故正好此淹留

秋日同宋玉鄉曲武英飲花石峯

海色當秋碧潮聲入午平一尊黃葉落萬里暮雲生衰老
思前事豪華變世情溪山獨不改仍是舊逢迎

游禪覺寺

策杖尋幽徑轉深禪關春意問啼禽勞人山色偏多怨留
客溪聲似有心掃石爭題苔斷壁傾樽直待月穿林疏狂
到處堪存跡明日重來過北岑

李雍熙字淦秋長山人諸生有翠巖偶集

詩話淦秋又號陸沈子卒於康熙戊申鼎革時年四十有一避地不出漁洋稱其詩古澹閑遠有陶令風

古詩

我生豈無涯茫茫眾人後達觀恨不早歲月若甕漏晚年
始愛道水火自相妬所憂精力衰大藥終未就入山雖不
深已足謝塵垢竹扉日夜開白雲入襟袖時有道人來金

經親授受讀之苦不悟沈思使人瘦一朝心爲開如月過
巖竇妙理清可悅谷神儼欲觀從茲剖昏瞶長願絕羣謬
萬劫有時盡至道莫能舊

白雲磻

司寇兄別墅

長白山中好崖谷翠飛巖高削蒼玉我來結茆卧其下老
樹當門一溪綠吾家康樂真絕塵夙昔本是青雲人偶然
高躅愛幽獨白雲澗北卜居新野徑紆迴抱丹嶂草閣茆
檐勢相向細雨春花兩蠟屐落日秋風一藤杖相過相對
每經時幽意但有閒雲知青林夜黑兀然坐玉液黃芽流
口脂我無靈藥身轉老欲鍊大還苦不早如君仙骨自天
生肯使容顏就枯槁何日丹成謝世情雲車風馬來相迎
我乘白鹿君黃鶴共向三山頂上行

過柳泉寺

雙樹閒精舍門依曲水傍
溪清石骨瘦山靜鳥聲長
佛日迎金鏡迷津渡石梁
風塵不到處此地足羲皇

王星室字營若號半霞信陽人明諸生有強裁篇南游
草北游草青箱羣玉

送野菴南行參訪

與君分手際是我斷腸時
溪碧水聲咽柳青風色悲
片帆煙上轉孤影月中隨
一衲餘無累飄然任所之

韓田字耕良大興人

詩語耕良與弟畱石耕皆
貞肥遜之節隱居不仕

卓龍文招飲誌別

客趁東風今日行
花間疏雨暮春情
酒因分手難成醉
琴

對離人別有聲何處銷魂鶯復囀一時和淚句還成遙遙
水驛山村路煙樹帆檣送去程

白孕彩字居實平定人明諸生有測魚集

詩話居實爲明諸生鼎革後棄舉子業居測魚村行吟澤畔時爲詩以自娛悲歌慷慨藉以見其懷抱

杏薄

杏薄作瓜架搯撈兩相宜彼無支蔓苦此無纏束辭雖經
惡風雨愈信相扶持瓜老充作薪勝燃涇花枝

誦山鬼

不知身是鬼道路一何幽芳草爲誰折靈修憺獨留死生
長夜恨風雨滿山愁有字還應泣無君甯弗憂

雪夜歸卽事

登臺作賦事成空閉肆圍碁技未雄天連白色疏星澹狹

巷無人一火紅

王建常字仲復號復齋朝邑人有復齋稟

詩話復齋爲蓋甫侍郎之案子侍郎在萬厯間爭挺
羣之獄侃侃有直聲至天啟中死於闖禍復齋入國
朝隱居不仕專治程朱之學粹然儒者鄉里矜式

斗室吟

作室大於斗棲遲亦自如不聞今世事但讀古人書有定
千情約無營一榻餘閒中時俯仰天地在吾廬

趙士蒔字伯潛掖縣人有觀物齋集

詩話伯潛明季諸生倡山左大社與復社遙應嘗欲
上書論軍事陳啟新以言進恥與之伍遂不果明亡
隱成山松椒去家五
百里終身不一至

遼宮詞

女伴從軍萬里還自言曾到玉門關赫連臺上秋雲捲遙

見河流入斷山

八月巫閭草半枯繡簾霜重一燈孤人生失意無南北笑
捲琵琶出塞圖

身似風前旅雁孤夜來猶自夢宣呼受降城上如霜月照
見行營寶帳無

大梁清禁隔蓬瀛仙眷何來五國城共矢餘年持苦行漢
宮環佩乞來生

張光啟字元明章邱人明諸生有張仲子詩

詩話元明隱居白雲湖上闢園題曰省園時花樹足
不履城市年至八十餘漁洋爲測定其詩題其後曰
君家郎中泊何似郎官湖雲氣流銀浦人家在玉壺
林園交水石煙火出菰蘆他日遺民錄千秋道不孤
郎中泊湖別名也

同侯夷門山人村外散懷

放腳荒郊外，欹斜憩夕陰。
漸看雲影遠，久坐草痕深。
紅樹多遮寺，青山半出林。
與君今日好，搔首共長吟。

獨坐

明月滿林間，卻坐無月處。
林影遠參差，夜牕不知去。

池上

倚杖池邊立，西風荷柄斜。
眼明秋水外，又放一枝花。

對菊

種菊叢叢傍石根，凌晨坐卧近黃昏。
沽來新釀經秋醉，開盡寒花未出門。

焦復亨字陽長登封人

詩話：陽長在明季有欲以隱逸薦者，力辭不赴。入國朝，遊遊山水，以詩歌文辭自娛。自署曰箕穎外臣，終不復出。

訪僧少林不遇

坐破團蒲記釋家參師底事去天涯雲開少室峯銜月路
繞黃河岸走沙東土問經空五蘊南宗聽講悟三車石幢
舊在無人禮落日寒林噪暮鴉

王體健字清有明諸生曲周人有讀騷齋詩集

詩話清有選亂以什伍法部勒鄉里收守望之助入
國朝棄舉子業從夏峯游講性命之學詩宗元白有
吟風弄月之趣

和陶飲酒

千載仰高風常懷郭有道託志苟無欺窮困何辭老自幼
寡歡諧因之就枯槁不知與捷足相視孰爲好我聞古人
言人生各有寶仲子匪能廉猶當推物表

高鑄字薦馨清苑人有淵穎集

詩話薦馨亦夏峯弟子居白洋淀側自號蘆中人好
游名山水得句必手鐫之嘗游林慮陟其巔聞峯下
耕者喧呼回視來路乃知衝虎過也有義烈編紀甲
申保定陷賊時死事諸君書數襄陽詩多獨造語

題楊生壁

溪山無俗情雲夢深昏曉歸訪素心人路間光已杳看煙
投一林霜滿孤村小鐙火夜方靜清言佐佳醪淡月影沈
沈衡宇幽花繞

春愁曲

涇煙柳岸隔蘭若迴塘淡白春漠漠寒姿晚態小窗間梅
風吹動春衫薄鷗翻流浪點青巢綠房幽韻耐攤書雲北
雲南牽不斷長眉愁結懸如綫

晚晴移詩匯卷十四終

晚晴謠詩匯卷十五目錄

邢昉 三十七首

金俊明 五首

徐波 七首

歸莊 二首

馮舒 五首

馮班 十八首

朱鶴齡 十四首

潘耒 章 十四首

任源祥 六首

顧祖禹 四首

俞南史 三首

王灋 十一首

呼谷 十一首

潘陸 二首

冷士帽 三首

郭開泰 三首

韓洽 二首

錢曾 一首

晚晴移詩匯卷十五

徐世昌

邢昉字孟貞一字石湖高淳人明諸生有苑游草石白集

詩話陳伯璣云孟貞詩無一暢懷語讀之令人增感施愚山謂其詩清超無纖埃池北偶談云順治辛丑李退庵過揚州余造謁舟中因論近日布衣詩余舉程嘉燧吳兆鸞退庵云終須還他邢昉傾倒如此可以知其詩矣

游宗遠明瑟園登池上閣

春水浮亂柳野色明郊扉榜舟適至門落花正霏霏雨後
罕人跡泉石皆芳菲因登池上閣四顧延清暉君辭公府
辟了知世事非荷葉始覆水釣竿已在磯嘹唳天邊鳥徘徊故退飛

登天馬山絕頂

紆路行山阿，舍楫趨遙嶽。陟險三四盤，雲巒鬱邈。緬九峯，若在掌一一。皆可辨物態，漸以繁新林。各舒卷振衣，厯危磴盤石，忻屢踐乍休。殊未厭莓苔不暇選，攀躋方自茲中情亦已展。

翠微接雲氣，孤塔標雲根。仰觀有突兀，始失中峯尊。亦有老子宮，寂寞清淨源。夙駕此山麓，道經平原村。斯人雖千載，江海存邱樊。何況盼睐間，芳草盈衡門。獨鶴下煙際，清音哀心魂。

海上多靈峯，茲邱亦其亞。林嶺互出沒，溟色涵變化。絕頂豈不峻，飛鳥已在下。緬思千將鑄，歎息夫差霸。東望范蠡湖，瀾瀾向雲瀉。古人何雄哉，揮淚想逸駕。來者有同心，深

期勿相訝

廣福寺晚望

蘭若緬一溪青松蔽廣澤石橋暝可渡練湖了不隔水光
動衣帶蒼綠間眾色我鄉亦如此鳬鷺慮相識望望一舟
遠煙中渺河適

印度在禪河菴與予寺舍相距五里紀事

結伴先結懶買山先買寺東西不可料五六年間事朝旭
開遠光松筠一步地與君隔一河誰是王居士菴以何爲
名宛有伊人意枕邊衣帶水澹澹涵一簣比我牀前綠清
幽乃不啻磬聲浮水上此境安能覲

古樹三四圍清陰剛覆屋晴雨相代間葱菁壓羣木我友
與我鄰幽然隔蒼綠登陟頗無阻往還逕當熟杳杳數旬

內至今虛一宿當密意反疏以此成幽獨盼君笋出土淪
之飽我腹斯時欲往情較深于看竹

別家

少不務稼穡與世苦枘鑿年長無故業好文成拓落三載
適越郊春風長靡藿江流搖碧絲山株亂紅萼荏苒東南
征淥水鑒城郭別家歎方起撫穉情彌弱名嶠夙所尙田
園安可薄海上當寄書坐待西風鶚

寺中偶述

離家百務止動息頗無礙力作漸不稀近寺驚僧輩覩此
眾人勞省躬日至再新麥僅兩畦信至勸歸刈喜霽昨意
真身動如一僨汗漫理不飽一往有微賴

穰穰非我情崩迫亦時有自此數旬內安閒庶無負湖中

烏若帆恍惚過眼後寓目盡冥曠日得計所受自知關福
力無福焉敢狃惟有常忍飢不爲神所咎

觀太子少保左公遺集作歌贈子直兄弟

熹宗御宇凡七載封狐虺蝎蟠天關錦衣狂狴鬼夜哭忠
臣之血何斑斑此時世路真坎壈大獄株連縉紳禍四海
奔波屬魏崔十年揮淚哀楊左左公蹇蹇龍飛前隻手取
日升虞淵大功久已在社稷巨姦側目來鴈鷗九關虎豹
聲闐闐左公背裂呼蒼天蝮蛇爭螫禍機發公也衣褐歸
園田羣兇噂沓牙爲磨檻車轟轟渡黃河紫衣校尉稱勅
使皖公山下愁風波詔書讀罷著囚服傾城觀者吞聲哭
捐糜安恤具五刑囊頭且復關三木幾日陰霾暗城闕長
安市中風拔屋天地震怒公殞命學士朝中皆魏姓豎子

甯堪玷太阿眞人已出懸天鏡盡驅魑魅掃氛祲垂手
握河魁柄公於是日蒙新典天書惻怛孤忠顯卽今慷慨
觀遺文龍螭五色何繽紛諸郎才器如天馬奔騰絕景仍
閒雅胸有至痛不敢言血淚哀哀向人瀉相將躑躅辭鄉
邑江上流離空四壁公侯必復理有之甘肥不御情尤裂
闔禍已熄更何論當時羽翼還雲屯况復天網亦疏濶此
曹玉食開朱門機深竊恐能飛翻嗚呼封狐雖死多子孫
安得努力一往呼天闔

同龍友石門洞觀瀑布歌

謝公昔爲永嘉守永嘉山水世無有朝登綠嶂興未已暮
踏孤嶼徘徊久惠連始入西池夢斤斧還搜石門洞闌寂
初從兕虎游幽閒忽聽鳴琴哢亂山夾岸清溪奔雙峯對

起開一門入門曲屈盡奇奧
銓訝古洞搖心魂巖上瀑流
白雲舞乍飛疑雪更疑霧
一道飄搖落千尺銀河正練
何足數飛流直下聲淅瀝登
潭孤石相戛擊隨風散漫入
林壑併作寒煙潤蒼壁摩崖
字畫紛朦朧賦詠無如天寶
工漫游已鐫晃美叔避暑復
勒蘇才翁我亦清夏來絕境
瀑雪潭光兩相映掛席仍懸
碧海心捫羅已得青田令古
人沒後空流水仙吏愛奇數
過此絕頂相看一惘然裹糧
策杖從茲始

東湖樵夫歌

石子岡前雨蕭蕭古木落葉
淩風颺侍中碧血今猶在荒
祠白日鳴鷗梟于役來作東
甌客父老告我東湖樵東湖
樵夫爲誰子負薪來往東湖
止朝廷不守金川門野夫合

逝東湖水樵夫樵夫眞丈夫一死奚足更踟躇我向東湖
轉惆悵嗚呼獨不聞雪菴和尚補鍋匠

紫陽院

曾聞丁令威化鶴一來歸翠竹生庭院青雲滿洞扉何人
能獨往有鳥尙孤飛我欲尋遺蛻因之採薜薇

寄涇上黃心甫

白露泣秋草涼風吹已淒平居滄海上消息澌湖西落木
轉惆悵微波各解攜一川猶可泝未遠伯鸞溪

同弱翁登華蓋山資福寺

山路日日霽已知秋色微薄雲歸嶺去落葉到江飛靈蹟
何時闕故人此會稀下方城郭裏秋望入雲扉

至靈谷寺簡張觀生

秋在何方見此間入門秋色引心閒
偏因失路能游寺每不逢人獨看山
澗遇泉枯猶汨汨松當颶發盡潺潺
爲詢屢宿山中客幾夜濤聲共一關

梅惠連出家自黃州來住寶林菴賦贈

微官曾似南昌尉一鉢三年寄一峯
却向青山成遠別獨餘黃面到相逢
謾從出世歌衰鳳且與閒潭制毒龍
回首楚雲猶有憶寒溪竹屋定時鐘

酬蔣冷生過訪鳳游寺覽古之作

路入青林折數盤君行訪古一漫漫
荒臺空自連雲樹白浪曾聞到瓦官
雨色乍開江岫迴鶯聲欲罷午鐘殘
豫愁歸棹楓初赤却向丹陽古渡看

雨中過文丞相祠題浩然樓

高樓獨上已淒淒雨色寒生大海西潮擁綠江新漲水碑
殘少保舊時題楚囚辛苦傷羅雉漢節歸來怨乳羝墮淚
欲陳蘋藻薦荒堦寂寂數鳩囀信公江心寺詩云祇爲虎頭非貴相豈圖羝乳有歸期

六月十四夜月泊江心寺謁文信公祠

江亭孤嶼鬱峨峨丞相祠前起白波樹色半隨沙鳥沒潮
聲遠送海雲多千秋馬角悲三戶一夕旄頭落五坡憶昔
枕戈揮淚處月明無奈溼衣何

從濟生菴至烏龍潭憩潭上

微風吹林氣境愜無深淺落日瀉潭影臨流恣遐眄灌木
澄漣漪水容紛漾演人煙雖密邇頗不聞雞犬宛宛舊行
跡十載一來踐惜無幽人廬蒿逕爲子翦

十五夜元長歸翼臺望月

落日臨高臺夕煙散叢樾山際滅微靄林端露圓月遙峯
水上青銀漢久已沒桂魄耿寒空幽光鑒毛髮憶昔此佳
賞經年限吳越世事竟倉皇迴思成恍惚倚檻俯平野悲
風千里發惆悵哀江頭黯黯驚人骨

初冬過印度山居

林空苔徑淺殘葉猶在樹杲杲日出微披榛得樵路睽離
越寒暑容色各驚顧我疑子更衰子歎我非故所求在衣
食屢別寡懽聚有酒幾共斟無生良足慕冥心投寂樂積
想曠幽素寒溪更相送汨汨流泉注

六月雨涼憶去年避暑高座寺介立上人院因以寄

懷

季夏盛炎節多雨變涼候繁柯滯層陰衣袂衛形瘦隔歲
南朝寺竹林敞晴晝虛窗度澗羽元偈咨神秀別來運忽
周念注迹如覲石上閒清颺煙中翳遙岫遠懷清淨子籬
扉復誰扣

讀祖心再變紀漫述五十韻

惟歲昨在申九州始破碎舊京雖一隅形勢東南會我皇
秉圭鬯雨泣面如磧臣民盡驚呼少康真可配史公踐台
斗心赤當時最靈臺占紫氣恍惚嘉祥屈亡何變氛祲太
白垂天戒宵光晝炯炯百日猶未退咄哉夜郎人小器自
矜大入手事擠排持權誇擁戴朝廷一李綱不容密勿內
貳獮本在野抵死呼朋類赫赫先帝書翻案神靈嘅誼士
惜繁纓兇黨蒙冠帶從此問王綱解散隨塵壙貂蟬併鏹

斧顛倒弄機械人心二豎灰世事長江敗泊乎皇輿播臨
軒會召對出奔忽異道此事令人怪得非靴中刀凜凜惡
姦檜所恨喪亂朝不少共驩輦城頭豎降旗城下迎王旆
白頭宗伯老作事彌狡獪捧獻出英皇箋記稱再拜皇天
生此物其肉安足噉養士三百年豈料成狼狽幸有兩尙
書臣節堂堂在又有楊中丞甘死如飲齧嗚呼黃祠部刀
鋸何耿介郎吏及韋布一二更奇快吁嗟郡國英螳臂堪
一喟宣歙始發難戰血塗草萊麻生怒衝髮氣作長虹掛
松林戰尤苦婺女兵終潰吳子要離烈張朱俱慷慨我悲
黃相國絕食經顛沛海上王將軍就死跡逾邁此紀乙至
丙大書得梗概正氣苟勿渝細不遺羣髯倘非斯人儔乾
坤眞憤憤大師南海秀簪立風塵外辛苦事掇拾微辭綴

叢蒼毛錐逐行腳蠅頭裝布袋前日城門過禍機發近邇
命危瀕伏鑕鞠苦屢加欽良以筆削勞幾落游魂隊諸方
尙雲擾瀕洞勢未殺雖然恍網羅慎勿罷紀載伊昔鄭億
翁著書至元代出土十載前金石何曾壞

山居偶興

首夏氣始燠喬木紛蔥蒨碧草露偏滋朱花晚猶絢荆扉
寂無喧卧起臨書卷窗外鳴嚶嚶新鶯欸不見時睇遠山
雲卷舒日千變夙昔安可懷忽復傷流電

神鴉歎

富池驛邊日欲西甘甯廟前煙欲迷雙竿半折廟門壞神
鴉散盡風淒淒風捲長波舟去急羣鴉飛上檣頭立送客
絲來懽客心舟上叫舞拋餘粒估船斷絕古祠荒無復醺

酒剗牛羊江黃何歲來盜賊從此神鴉稀食肉神鴉有神
長忍飢不向江灘啄人骨

楚江雁

江南八月蒲稗黃天邊雁叫煙蒼蒼厯落沙頭併水際三
三五五分成行當時見雁心悽惻本爲思家歎離隔如今
繫艇武昌城始知身是江南客木葉蕭蕭下漢川參差鴻
雁忽聯翩白雲洲上疏還密黃鵠磯頭斷復連河口雲深
迷楚樹分行作隊紛無數聞道瀟湘菰米多天寒更向瀟
湘去

故宮燕

君不見故宮燕春雨秋風幾回轉宮中風雨長蓬蒿飛入
宮牆繞虛殿穿簾度閣羽差池盡日呢喃人未知柳綠乍

唧千尺絮花開仍拂萬年枝玉堦寂寞翠窗冷畫棟差池
春燕影歲歲營巢竟不成春來秋去誰曾省可憐此度秋
風早整頓毛衣猶自好裴徊欲別未央宮萬戶千門忽如
掃鐘簾何年去洛陽仙人辭漢淚成行最苦西飛雙燕子
回頭不見舊宮牆

鳥噉金井桐噉聲易鳴咽未若向西風傷心故宮燕白門
燕子去秋風社日年年無不同惟有曾棲青瑣闥欲去未
去悲西宮卻憶西宮前歲築禁籞勾陳俄彷彿不道君王
事卧薪頗聞將作誇神木一月宮前纔列仗翠華西去塵
飄颺虛殿無人燕子來三春對語雕梁上轉眼誰知事更
非雕梁藻井似蓬飛明歲壞垣春草裏茫茫何處問烏衣

酬葛元士

十載一握手憐予今日頭春風雨相惜縞帶已生愁細草
搖南浦輕雲繞北樓非君歌古調何以慰離憂

贈祖心上人

曠然攜一笠萬里到人間吳越峰邊過羅浮夢裏還漫游
逢世改因亂未身閒十月梅花發心悲似故山

送翁壽如之揚州

行李遲明發渡江何日歸秋風吹去路水色上征衣戰罷
城池在潮生海日微君看稻梁雁一一盡南飛

虎邱寺

玲瓏山翠幾沾衣夏木千章總十圍一自王郎開梵剎盡
令江影入巖扉闔閭葬後山長在范蠡歸時姓已非千古
卻疑沈劍處如何不見二龍飛

游興國寺

沔口孤城夕照中
偶披榛草問禪宮
客來樹下看駝迹
鳥去堦前避馬通
趺石尙存新記改
經廚已破舊房空
當年大別銘方丈
此地人傳蘇長公

和祖心上人游城南謁方正學先生祠

寂寂荒祠野靄昏
蕭蕭殘碣倚松根
金川門又成亡國
石子岡偏欲斷魂
昔日麻衣慚叔父
于今青草失王孫
廢興自古須臾事
獨有先生戀主恩

金俊明初名袞字九章更名後字孝章號耿庵吳縣人
明諸生有退量稟

詩話孝章吳中高士詩書畫皆絕俗墨梅尤工斟酌
繁簡別成雅構卒於康熙乙卯年七十有四漁洋有
詩云維摩丈室幾黃昏春草閒房日閉門成佛生天
兩何處暗香疏影爲招魂當年五字寫柴桑文寄孤

山世外香一幅生綃千載意也應配
食水仙王因畫感舊其傾倒至矣

孫銘嘗墨蘭歌

幽人歲晏松柏林愁雲黯淡凝寒陰蒼梧斑竹若眼元
圃瓊枝無復春王香隱谷久寂寞眾芳蕪穢傷人心援琴
一鼓三歎息湘水浩浩空霑襟有美孫卿芳竟體讀騷望
古晞良辰遨遊結客愛奇士一往懷抱含高深古來賢豪
多道藝悟餘游戲皆絕倫墨波流霏接沅澧筆區滋畹花
續紛指端拂舞真貌出鞭笞風雨何精神憐君持贈滿冰
繭珍踰端綺雙南金言忘交澹識君旨芳菲襲目遺愁辛
聞君劍術尤莫比壯志俯屈同風塵獨留紆鬱寓染翰俗
外賞激誰知音我亦沈冥舊皋羽三歲菱約桐江澤何當
抽怨向白日交佩相羊情質申徒然霜霰厲叢薄天地豈

應終不仁憶翁孤露曠相感本穴空根悲至今

和致一韻

若木甯忘拂羲和底易傾百年如此日孤抱欲誰明野暮
愁風色湖寒斷雁聲可堪良友共衰老慰吾情

寄劉廣文欽爾

泛泛狎羣鳧流年又幾徂命將時大謬星與客同孤澤國
仍飄泊鄉書近有無轉羞松雪子空作水村圖

清明日同遜兒作

頻年羈旅向風塵尙憶嘉名在此辰四海兵疲悲戰燧千
家鬼餒嘯陰燐垂垂酒旆旗亭雨寂寂花泥馬廐春強把
一尊那得盡石泉槐火爲誰新

讀史

丹穴傳訾世莫爭用財爲衛守能貞祖龍勢力傾天下猶築高臺禮婦清

徐波字元歎吳縣人有浪齋新舊詩

詩話元歎居天池落木庵鍵戶長吟心如止水恆斷炊靈巖退翁分鉢中餐周之他有所遺弗屑也收齋贈以詩云皇天老眼慰蹉跎此七十年華小劫過天寶貞元詞客盡江南留得一徐波元歎少與鍾譚友善落木庵榜卽竟陵所書詩中亦時及之

夜寒與劉石君陳伯迎叩達公河畔禪居

月斜道少人風吹旛獨舞入戶燈光微古佛爲之主斧冰析寒薪茗椀味餘苦城上雙槌鳴歸途各自取

再宿包山蔡居士湖上居

湖山相與晚秋館自多陰黃葉悲遺老孤鐙攝夜心蘆花月上易水色雁來深彷彿當年事情生不自今

若耶溪望對岸雲門諸峯云中有三十六灣溪流宛
轉會日暮無人至路口而返

秋溪如月上轉泛無終窮微波出城路幾樹迎船風眾慮
一洒濯遠色久玲瓏峯影半水面秦望標其空人間仰蒼
翠山中閉洪濛思乘青竹筏周流元氣中日落松柏裏先
夜水仙宮風雲多氣勢獨立恍余躬靈境遂相失分手但
西東

涼夜懷鏡新上人

久坐身無影知師心已安蟲悲天地窄月近水雲寬猥巷
違羣動荆扉閉小寒是能從所悅持此寄人難

月下與商孟和尋陳古白於鐵佛山房

月中坦步似乘虛忽憶幽人靜默居鐙火叩門通欸欸衣

冠隱几出徐徐向衰有幾相逢地少賤空多未讀書天與浮名宜漸棄亂離持此欲焉如

宿弁山積善寺同周虛生作

雲峯終不近石路寺門前霜蔓懸瓜重風庭聚葉圓殘鐙連曙鳥眾響入鳴泉愛此清虛夜與君得晏眠

七月望後寄寒碧上人

與鍾譚亡友周旋甚善

楚鬼微吟上峽謠中元法食可相招憑師爲譬興亡恨雨打秋墳骨亦銷

歸莊字元恭號恆軒崑山人有恆軒集山游詩

詩話

恆軒好奇世目爲狂生崇禎季嘗更名祚明其

別字或稱歸妹或稱歸乎來或稱普明頭陀或稱塵

鑿鉅山人若元功園公懸弓則皆取與元恭同音善

行草書工畫竹嘗作萬古愁曲子自古聖君賢相無

不識訶而獨痛哭流涕於存亡興廢之際辭極恣肆

後傳入宮中世祖甚賞之以授樂工命歌以侑食

遺民之歌哭播於興代之宮懸全謝山得沈釋堂所
記以爲一異事也近人據舊鈔本定爲熊魚山作
題福源寺羅漢松

福源建自梁大同創寺之年植此松歷千餘載寺再廢此
樹不改青蔥龍大二十圍高難度攬拏天際如虬龍石根
鐵幹苔斑駁狂風搖動聲錚鏦夜然長明鐙晨撞萬石鐘
聲光震耀生靈怪柯葉常有白雲封水車之役大木盡斧
斤欲加鬼不容天王柏上方松昔年來游有題詠何況此
樹六朝之遺蹤松之名者今有報國古岱宗彼以神京名
嶽顯此獨晦匿於震澤之濱縹緲峯大材僻處自矜貴賞
玩不辱於凡庸大抵植物有如此人生何必皆遭逢嗟哉
人生何必皆遭逢

落花

枝上黃鶯漸露身飛英歷亂墮紅塵將隨薜荔依山鬼難
共靡蕪待美人河北名園貪結子武陵歸棹欲迷津香車
寶馬緣都盡天與幽人一錦茵

馮舒字已蒼號默菴常熟人明諸生有默菴遺藁

詩話已蒼與弟定遠並負詩名善持論爲錢牧齋所
推許近體以晚唐爲宗古風才氣視定遠差縱逸晚
年以懷舊集被文字之禍先在崇禎中因牧齋
獄事牽連被逮所著虞山妖亂志敘述最詳

過堯山

旅舍窗穿漏殘月擁被難禁朔風烈未分曙色雞始鳴僕
夫戒途催曉發試問前行何所之云有堯山峯突兀縱橫
無人六十里魑魅强梁戒倉卒畏途聞此骨已寒託身蹇
衛甯交睫東方殘魄何希微太白當空恣蓬勃忽然狐兔
立如人俄爾鬚眉凍成雪此時心死魂欲墮身命已拚輕

一擲豈知險阻本無多頃刻矐矐曉光赤遙望炊煙五里
餘草短霜乾亂行跡中宵噩夢忽然蘇前此憂危總冰釋
始信人言不足憑直道自應無險阨丈夫但保坦蕩心地
濶天空未憂窄

丙戌除夜是夕立春

枯草還蘇又報春亂餘留得病中身懶攜筇杖尋如願聊
剔鐙花誦逐貧眼暗怕看新換厯鏡清慚負舊時巾閒愁
總有三千斛擬寫長箋奏玉宸

仲夏村居

尋得君公避世牆開門遙趁竹風涼逢僧自覺心期在曳
杖還誇腳力强高摘白雲供笑傲倒騎青牯恣顛狂海鷗
自是忘機者淺蘼深蘆處處鄉

柳絮

不著根株到處生飄爲飛雪落爲萍江流看取千尋濶占盡還應賸一泓

漫漫密密逞精神棲薄何分溷與茵卻恐章臺新雨後也隨馬足伴紅塵

馮班字定遠號鈍吟常熟人有定遠集鈍吟集游仙詩

王東澂曰趙秋谷於近代文章家多所訾警獨折服馮定遠一見鈍吟雜錄卽歎爲至論至具朝服下拜嘗講定遠墓以私淑門人刺焚於冢前張南山曰定遠臨桂伯墓下絕句蒼涼之意出以縣麗之詞是謂才人

之筆

詩話定遠論詩力排嚴滄浪之說故爲秋谷所傾倒其詩以晚唐爲宗時復溯源六代貽息齊梁尤不喜江西派謂熟讀義山自見其弊所作雖於義山具體而堂字未閱每傷纖仄則才限之也竹垞所錄多風懷之作今取其意較深摯者游仙下編出於滄桑之後殆進一境焉

猛虎行

煙霏霏雨微微，倭鬼啼猛虎。饑山家苦竹圍，茅屋遙見煙中尾。
轟轟夜聞前村失，黃犢村路泥深印。虎足天胡恩此物而俾之，食肉不見泰山之下婦人哭。

燕

解舞腰肢解語聲，伯勞相背兩輕盈。將軍若愛封侯相，正待金門甲第成。

長養嬌雛翅未齊，一圍竹樹晚低迷。當時若愛吳宮住，爭向茅檐得穩棲。

經瞿起周曇園

華屋重來淚暗彈，桐陰滿地作秋寒。游絲風撼啼鴉樹，積草煙生鬪鴨闌。誰論絕交思任昉，空憐誅德有潘安。壞牆

醉後曾題處徧檢蒼苔自讀看

江南曲

春風一夜吹江色千里細煙生亂碧草芽纖細徧金陵古
石苔荒江令宅年光歲歲常如此千燒萬戰臺城圯鴟尾
塵埋三閣平張孔銷亡二周死石頭城下水悠悠暗數興
亡得幾籌山川不改繁華在兩槩依然迎莫愁

行路難

自許直如繩看君白如雪一朝更變不似先霧裏看花雲
裏月夢中不悟君心異言笑依依尙相悅五更欲曙百鳥
啼元鬢生絲淚成血念君舊恩君豈知萬物榮衰各有時
君不見黃蜂階下收殘蕊轉眼飛鶯過別枝

村居月夜

東坡全集卷之十三
微雲不礙月木落小庭寬老去餘殘興朋來免獨看鵲飛
愁到曉牛喘不知寒莫問悲秋意關山行路難

感事

風景當前漫撫膺東南忍見杞天傾龍盤王氣山空在馬
渡江潮水未平誰致倒戈攻鐵甕更聞降孽掠蕪城謝安
王導惟邱墓天塹徒縈十萬兵

和錢耐翁次先師韻

廿年藜藿許君嘗曾爲成章賞我狂草發陳根山自碧鶯
啼宰木梓空長東門有恨還無嗣北海何人爲立鄉最是
驚駘筋力盡幾回驤首憶孫陽

寒林

曲直郊原樹風中寒色來枝交夸父杖意盡仲文槐漏日

穿斜影封霜滑破苔秋前搖落意年長倍添哀

柳枝詞

汴水東來欲下遲千條依舊裊金絲
蕭娘流落宣華死當日春風爲阿誰

臨桂伯墓下

馬鬣悠悠宿草新賢人聞道作明神
昭君恨氣萋宏血帶露和煙又一春

游仙詩

龍伯無人釣餌閑黃金雙闕自煊爛
燕昭老去秦皇死可惜蓬萊在腳間

配直長林禁散行飄飄羽帳綴珠纓
偶然夢見歌謠處卻是風吹玉樹聲

金母東家獐小郎摩挲寶劍倚天長笑他后羿調弓矢不射妖星射太陽

回首空城一掬灰誰知白骨是仙才遼東城郭非如故何不丁仙更一來

靈文深秘莫輕論空學元談未合真好笑少年王輔嗣洞宮長作守門人

臺觀茫茫苜蓿肥至今汾上白雲飛歲星便是騎龍客辜負君王獨自歸

朱鶴齡字長孺號愚庵吳江人有愚庵小集

詩話長孺明季諸生國變著書不出所學以說經爲長其尙書碑傳詩經通義讀左日鈔李義山詩注及小集十五卷皆著錄四庫集後附傳家質言十餘條謂庚午辛未間復社盛興邑侯亭宇唐師薦於張天如先生欲得余一見卒不往由今觀之大社果非美事余之不往不失爲自立又與吳漢槎書云三十年

來奄忽無成始而汎濫詩賦既而暇勉古文後因老
友顧甯人以本原之學相勗始湛思覃力於注疏諸
經解以及儒先理學諸書麤有成編提要稱所作韻
語頗出入少陵義山之閒而寄興清遠能不自掩其
神韻明詩綜錄廣志感遇二篇皆不見集中其五
七古多感愴低徊驚心動魄之作今備采以補之

感遇

吾生本天植廓然棲靈根神明坐搖蕩遂與狂奔風波
得深警萬感寒心魂賤貧生易達寂寞吾道存庶幾屏形
累出入無窮門

朱明未云滿龍火已西移日車無續景壯士安能持一葉
墮庭柯寒風栗我肌老壯更相迫蚩蚩欲何爲榮華爭努
力祇供霜霰欺誰見西山藥可駐百年期

敗葉鳴空階號蟲弔秋影默默誰與娛憂憂互相引達人
感無生志士抱遙省苟無繁霜驅安得腐草屏天心警虛

華物性趨嚴冷徒深顚顚悲此意誰能領

流雲本無陰日昏氣隨變桂蠹非一朝桃蟲生隱患但見一葉秋已知三陰晏如何守蚩蚩倚伏失前算天運忽已移山花亦彫換禍樞豈無因徒令識者歎

易填東海波難鏟太行險太行方寸起一步乃九坂鋒矢日相尋毒流及元冕柏梁隨草根瓜蔓終不翦往復見天心殺機還自踐悠悠白馬津千載同憤懣

熊羆不相啖梟獍不自戕人則甚于斯生理安得長儒教發大豕陰符蓄不祥古聖貪所務遂開後世殃傷物無獨利愚者乃爭強干戈終未已勸君且後亡

峽中亦有日海外亦有槎我生獨崩迫沈憂浩無涯出門愁滿道入室愁滿家芳蘭骨不立叢菊秋空花萬物非可

悅百年誰見賒如何違此性役役隨翻車

神龍無尺木反爲螾螳陵芳蘭生匝牆亦隨蕭艾零小人
甘齷齪安知楹與莛黃鐘奏鏗戛反謂蟲鳥鳴神物不可
侮侮之見精靈君看百丈湫怒蛟誰能罾

赤日盪靈魂秋水澄心胸覽觀良已久何用謀去從此蜉
享朝景自謂百年躬智愚迭相笑萬古同夢夢西南望懸
圃光氣何熊熊玉英無敗色靈草有鮮容誰能追羽駕煉
藥瑤池東

苦寒行

頂帝寒威何酷烈東南地維迸將裂太湖堅冰百丈深魚
龍潛竄重陰穴千村惟見凍凝雲萬頃不聞濤噴雪西風
日吼天地昏估客漁翁往來絕瘦日隱見無晶輝鍾山燭

龍光欲歇雖然陽氣終回旋可忍罷民重酸切官稅榜笞
髓已枯天行嚴凜骨還折時聞艇子陷冰圍絕炊隕命竈
鼃窟兼之茆屋僵赤膚妻兒號寒忍嗚咽嗟乎彼蒼何夢
夢水旱頻仍不堪說復見殺氣東南行災沴荆吳恐仍結
君不見千戶封五陵俠輒裘快馬出京闕誰信無衣叫寒
月

湖翻行

太湖西來天目源七十二溪波濤奔震蕩有時溢原野未
聞浩瀚迷乾坤五月稻秧齊插蒔三旬霖雨水澎湃方憂
漏天移澤國忽駭狂瀾卷平地颶風猛發神鬼愁火龍擲
火驅潮頭漂砂礫石失垠岸發屋拔樹蟠蛟蚪聲如列缺
鬬霹靂勢如共工傾不周乘陵城郭墮欲倒千廬萬竈皆

洪流巨浪翻騰高屋過大魚撥刺平衢游更憐人畜死無
數浮轉塞港漂難求百歲老翁驚歎久此災邑志從未有
乘船入市何足云地軸翻天浸星斗我時惶遽無竄逃急
上高樓守簍簴竟日魚釜無炊煙澆愁何處沽村酒變不
虛生豈偶然撫時感事心欲嘔盛朝錫賑久不聞長吏敲
撈肯停否欲訴眞宰天茫茫九關虎豹狎獮守吁嗟蒼生
爾奈何但見號咷走童叟

同大庾介白朗威茂倫樵水海序小集道樹庵

徑入荒畦僻相攜支許儔院涼煙起翠林淨葉驚秋杞橘
浮香細葳莎向晚幽紺園淹對久蘿月已如鉤

酬姜如須見寄

支離一病歎無繆經案繩牀對綠蕉猿鶴化來機漸息芝

蘭焚後淚難消鹿門本自甘遺散皋里憑誰慰寂寥澤芷
江離無限恨頻傳莫惜五湖遙

寄徐昭法

一別精廬歲月徂比來曾有宿春無身窮壑谷能逃忌隱
託文章不厭孤春院繁英傷錦繡秋風落葉感菰蒲稻梁
那得縻黃鵠莫怪長飢化白鳬

潘耒章字力田吳江人明諸生有觀物草廬焚餘橐

詩話力田幼慧通天文地理皇極太乙等書專精史
事與同里吳懷庵炎同罹莊氏史獄兩人皆與亭林
雅故力田初作明國史考異成十之六七亭林服其
精審莊氏修明史未受其聘莊以其名重於卷首列
入參閱遂被禍亭林時客汾州賦詩遙祭又寄力田
弟次耕詩有云猶存太史弟莫作嗣書人後次耕舉
鴻博與修明史初所未料力田詩才不逮次耕而真
宰所存未可磨滅虎林漫成四首在獄中作愧庵則
竟無所傳矣

聽陳鍊師彈琴

商絃川上發元言振棘林白鶴下庭際北風微來侵排雲
呼闐闐浩蕩思難任僊僊爲我馭雄龍空中吟曲終有餘
暢洞門花落深豈惟冥俗累亦以澄道心邱中雙桐樹霜
雪凝奇音吾欲採其幹贈子徽黃金

丙申寒食

陌上初過雨人家欲斷煙長因三月候重憶十年前荒薺
埋陵殿饑烏集墓田併將家國淚一灑白楊天

集菊花下忽憶亡友謝兩周吳北窗悽然有感

徧插兩人少悲歌安可聽花前詩異代天上酒雙星栗里
招同去浣溪祝不靈黃華如勸客杯到莫教停

答皇士見懷

曾列中朝侍御臣獨將詩史慰沈淪見聞先世存微隱論
次遺言入雅馴人閱死生徵共信事憑好惡定誰真思從
藜火分餘照敢擬當年歆向倫

飛騰前輩早升堂零落遺編賴表章

皇上有遺詩之選

一代雅音

歸正始千秋潤色愧三長荀生餘力傳申鑒陸子何心著
辨亡自謂整齊非妄作名山副本待君藏

擬收京

天家旌旆下重關朝會花冠震百蠻兩觀已懸新鈇鉞羣
官猶戀舊行班風雲驟捲邊沙靜日月重開社稷還喜聽
謳歌同屬啟鼎湖有泣不能攀

軍城早秋

西風獵獵臂鷹輕不見平原雉兔橫玉帳丁甯無一事只

須高起受降城

白雲泉是白太傅題詩處

白公遺碣策茗生落日空亭見一泓借問涓流爭到海何如終古在山清

關山月

繡衣金匱匣寶馬鐵連螭出身誓向邊場死那能宛轉妻
兒前離家復見故鄉月見月思鄉情不歇天山飛鳥卻向
南隴頭流水分鳴咽幕前健兒歌且悲霜寒風勁胡馬肥
閨中遠不聞吹笛塞上誰愁聽搗衣可憐夜夜關山月只
照從軍不照歸

和陶乞食詩贈乞食諸君

溝壑勢所逼貿貿行安之促步望煙火低頭好言辭善悉

主人意高義無嗟來升斗竭所餘滿腹輒廢厄感激話疇昔內熱牂羊詩同里無賑恤曷云濟世材愧客供給薄強飯以相貽

虎林漫成四首同吳愧庵作

抱膝年來學避名無端世網忽相嬰望門不敢同張儉割席應知愧管甯兩世先疇悲欲絕一家累卵杳難明白憐腐草同湮沒漫說雕蟲誤此生

吳關一路作羈縻棘木庭前聽五詞已分殘形輕似葉卻憐衛足不如葵下堂真愧先賢訓抱壁幾同楚客悲縱使平反能苟活他年應廢蓼莪詩

園土初經二月春薰風又到繫維身流螢夜度綈袍冷採蕨朝供麥飯新敢望左驂歸越石還期長珮擬靈均多情

最是他鄉侶閒譜龜茲慰苦辛

閱歷風霜祇自疑難將身世問時宜窮愁只合吾儕事
姓氏羞爲獄吏知見說成書刑鑄鼎不聞有夢召胥靡
南山此去躬耕好未可重題酒後詩

任源祥字王谷號息齋宜興人明諸生有鳴鶴堂集

詩話王谷與同里陳定生相友善定生故與貴池吳次尾梁溪顧子方共倡留都防亂揭以攻阮大鍼者也留都潰次尾子方死定生伏處村舍王谷亦棄諸生服以詩文自娛中州侯朝宗至宜興定交朝宗嘗敘其詩謂銅官兩湖山水之勝其中有

人陳子其年任子王谷足以當之矣

贈史遵之

涉江采芙蓉日暮不盈掬念子好芳草棲遲水中宿
中有雙鴛鴦羽毛紛沃若知君無嫌猜相隨傍君屋

贈侯方域

有客自梁園薄游千里來舉手揖故人下馬拂遠埃同調
誠匪易相逢述中懷我友並讌集良夜相追陪開筵飛羽
觴璀璨列九微諸伶按節歌絲竹清且悲參橫斗復轉霜
露塗堦墀君有慷慨情今昔多所哀黃鵠絕四海羽翮何
差池詠彼西園詩心焉難奮飛

贈陳維崧

灼灼幽蘭花馨香不自持昂昂千里駒終當任驅馳寒暑
相代謝藏用各有時譬彼齊紈扇當春復光輝華堂列高
燭清夜相追陪雞鳴駕言別俛仰各賦詩江漢東南流浮
雲西北飛願君崇令名千載以爲期

哭陳定生

天道一何遠奪吾陳仲弓典型忽已替志義更誰同憶昔

文章盛相資氣誼隆先民推李郭後進說褒融清議排羣

小危言仗數公司徒神采毅

定生父于廷左都御史

上舍羽毛豐蔚

顧名流輩龍鸞國士風節由貞母峻德自隱君崇

定生曾祖母邵

氏貞節建坊祖一經稱孝潔先生

疾惡元成性防微實有功

定生與吳應箕顧景出留

都防亂揭逐阮大鉞禍機乘間發世變涉塗窮

事詳行略

消長波濤裏存

亡險阻中馮生如束溼吾黨盡飛蓬碩果人還在靈光數

未終銅官秋色靜陽羨曉雲空默坐書千卷論詩酒百筒

忘年爲倡和推分略愚侗得句成欣賞繙經賴折衷狂夫

慚阮籍老友識王戎

長君維崧與子爲石交

庭訓高宗匠家聲擅國

工祇今瞻仰失歌關涕霑胸

贈侯彥室

朝宗子

遂爾持雞絮仍然得鳳毛多聞光世及如見慰吾曹問字

篝鐙苦傳經閱閣高梁園千載事今又屬枚臯

陳其年游姑蘇歲暮卻寄

吳王宮外踏歌行紫玉墳邊臘鼓聲歲暮乘舟湖海客綈裘春草不勝情

顧祖禹字景范無錫人有宛溪集

詩話景范僑居常熟之釣渚故以宛溪自號晚年崑山徐司寇聘修一統志書成司寇欲疏薦之力辭蓋自甘爲遺民也所著讀史方輿紀要亦於志局成之采撫要刪博而能精諸行省皆有總論臚舉形勢證以史事足與馬端臨文獻通考總分諸序相埒開誠摯善與人交與魏叔子爲友叔子來游與同觀挑花值雨親爲執蓋叔子客死真州奔哭甚哀爲文以悼之其篤友誼如此遺集久佚不傳僅於梁溪詩鈔海虞詩話中略見片羽

送王石谷惲正叔

秋色牽衣戶半扃君行應念此園亭桐枝濯濯傍檐綠竹

葉垂垂帶雨青別意欲言思轉澀愁懷難解酒無靈漫勞
握手增惆悵他日還添兩鬢星

過石谷秦淮水閣看畫鵲華秋色圖

輞川六月寫滄浪夢入平津逸興長卻憶揮毫千萬里風
生腕底爲君涼

送魏叔子還甯都

大地方沍寒君行涉江水問君行何爲抱膝深山裏易堂
好弟兄事業寄文史天空鵬鶚飛日落雲霞起遙望翠微
峯迢迢四千里吾欲牽君衣君行其少俟好風從東來揚
帆疾如駛山中正春光寒香放梅蕊

甲辰九日感事

蕭颯西風動客愁攜尊無處漫登樓赭衣天地驪山道白

恰親朋易水秋征雁南飛無故國啼猿北望有神州茱萸黃菊尋常事此日催人易白頭

俞南史字無殊自號鹿牀山人吳江人諸生有鹿牀藁懷徐元歎

樹暗川原淥閒堂晝已陰我愁一水濶君又萬山深遠樹芳蘭渚空思薜荔吟名高身不出花下且彈琴

過顧茂倫村居

境以居人重情因遇故深酌泉偏愛淡看竹共分陰草木山中厯桑麻世外心閒吟忘永夜明月照披襟

游元墓因禮三峯禪師塔院

暮春招我友輕帆遠相屬溪盡未卽登捨舟遂遵陸憇蔭稍遲留一覽契遐矚鐘聲杳靄間流映春山綠徑僻步紆

回空香沾草木紺字插松顛花宮掩深曲入門器盞嚴矚
禮威儀肅高下隨所構長廊遞相續水色湛虛明幽林隱
清馥惜哉創者難遺影空堂宿靜念有餘思躊躇下山麓
王澐原名溥字勝時號僧士華亭人明貢生有輞川詩

鈔

烏棲曲

黃昏漠漠黃雲迷烏來欲棲不得棲十二樓臺鎖煙霧烏
來棲向誰家樹此時客子心惻惻起看落月霜華積一聲
清角烏頭白

春日村居

冉冉年華去遲遲春日來倦游宜閉戶晏起怯登臺雨至
催鳩婦風輕出雉媒微茫三徑在誰爲破蒼苔

小築違塵市西嚮舊草堂誰言林未密惟愛日初長宿雨
低江柳晴雲上海棠晚來餘興在秉燭繞迴廊

酬張洮侯

滔滔塵市裏之子自悠然能著幾兩屐權牽岸上船刪詩
四始外頌酒七賢前被酒行吟者誰知是列仙

春興

寂寞幽居獨閉門三春風雨暗荒村堂前海燕驚新壘澤
畔江蘼滿故園老至漸思榮叟樂狂來尙念武陽恩平生
不負漁樵約十載鶯花酒後論

探奇南到會稽來上巳東風一舉杯白日雙珪大禹穴青
山萬點越王臺江關詞賦多哀思幕府風雲少霸才曾是
六龍飛動處登臨無地不徘徊

上苑花飛御柳絲
葱龍煙樹鎖龍池
已誇絕域來符拔
更著新冠飾駿驕
種就葡萄驕玉勒
吹殘威栗醉金卮
漢宮舊事誰曾記
青塚春光又一時

喜劉臣向至卽送其栝蒼之游

聞君耕釣大江濱
十載心期託隱淪
檻外風帆收楚蜀
夢中煙月隔梁陳
逃名昔日因鉤黨
作賦經年未逐貧
東海爲予勤寄問
仙都賓客是何人

仲春大雪漫效元人體題顧寄園倣右丞江上七樹
七十風流老畫師
練裙紈扇竹枝辭
無端催卻春歸去
獨翦孤鐙對墨池

我家右丞江上樹
近在滄洲尺幅間
今日爲君重設色
滿天春雪點春山

贈孫錫黃移居

小山招隱野人家叢桂森森倚檻斜客至不知誰是客登樓閒坐看飛花

呼谷初名簡在字德下崑山人明諸生有葵園集

詩話德下明亡後謝去諸生邂逅荒郊足不入城市者二十餘年錢受之見其南燭詩歎爲絕唱期一見不可得葉文敏撰獨賞集稱爲東南隱士之冠文敏蓋德下門人葵園集其所刻也

歸元社游鄉校詩

子總角時與同里歸元社等七人爲兄弟交元社最長稱兄篤行能

文而久不傳爲諸生歲辛巳鄉貴有利其婦翁多贊者嫉元社繫之暗室申予與朱子與升求之不爲得值俠士葉水修眉初手斷其鎖出之旋就試爲諸生而元社年且三十有八鳴呼以元社之爲人雖終不得志而屈辱於人雖諸生亦不成雖復去而爲賈爲農爲傭夫亦何傷亦何病於予之與友然爲諸生矣予嘉其處困而讀書不衰且以舊好作元社游鄉校詩

世人好結交結交如麋麋君子重結交結交比金銀麋麋

驚則散金銀爍則新我儕二三子束髮少小親寒暄十年
外居址尙比鄰豈無死與生豈無富與貧同憂處亂世恭
敬祈免身歸子性最純無故爲寃民幸逢奇俠士今易儒
者巾采芹樂泮水呼我酌更斟欲酌向他人他人未必真
不如二三子習熟寡費神蘭蕙自楚楚百草蔓荆榛交隘
吾道廣未願四海人

西寺施粥

金木有饑饉所荷均皇仁常平盛朝事水旱膏無屯吾生
值亂世此義安復陳行麤遵月令爛額愧徙薪有司僅倡
募中懷實苦辛獨飽視眾饑未忍越與秦黽勉告同志蒙
恥亦揀民豈無西江波斗水涸轍鱗捐家散百萬惜哉無
義人豈繫無義人邑小人實貧

晨朝操瓢勺襁負及子孫重趂五里至後先爭一門涓滴
未入口假息半游魂須臾見人色果腹倚樹根幸脫胥吏
手眾施厯厯存殿角旭射光羣飲聲泉奔施者見受人舉
體同春溫取意快目前冥報奚暇論安得嗣旬月更使被
遠村

和豐庵詠和載西禪師

燼香陷爐側饑鼠竄荒圻佛鐙澹微明隙光出林梢棲鳥
靜相依見慣亦安巢何人炤無寐夜聲風雨交
屋梁飲初光威儀照四座一嘿念羣生山鳥已廢和妙香
清餘聲朝氣始無情梵轍鳥亦寂樹滴露珠顙
地僻心已遠澹然寡營欲時聽止觀經共此深密竹泥彼
林泉清飲我僧飯綠閒曠每白日客至遠塵俗

亭亭百年樹諸天密護計本以待莊嚴因之覆蔭櫺空涼
浴佛頂交枝雲亦滯上爲風雨痕下有龍蛇勢

一泉爲雙井雙亭行人息駁犖千歲苔彼此無殊色俯臨
披水容曲堤影偏直禪子坐無枯隔竹日聞汲

夕陽有何意欲說與開士嶢嶢天外青當窗一峯峙真氣
晚益佳賴此淡城市歸鴉向蒼煙將息復舉翅

寶劍篇

風胡死後失神鐵若耶谿平堇山穴誰取荆軻一片心融
作魚腸三尺雪左蟠青龍玉錯文右蹲元豹珠環潔代遠
苔荒蝕字痕獄成冤沈霜欲折開時但見土五色把似眾
星俄失列當時百鍊金液存水火千年魂魄結佩之袵帶
致雷雨天人咫尺相提挈飛行中夜千里還足練寒光河

漢絕神物出興關世運應指機槍電掃滅我欲贈人拭明月走盡燕趙無豪杰湛湛蓮花歸藏匣雄雌相思聲嗚咽
過徐介白齋中題贈

世亂君全福清貧花一畦山中逃祿母樹下灌園妻節苦時賢怨形疏里俗詆閑門乞書畫桃李亦成蹊

潘陸字江如吳江人明諸生有穆溪集

包驚幾夜過

故人寒夜至風雨暗東窗不忍論前事還同哭所知住山多病後學佛破家時猶念飄零者殷勤重有期

同玉魚過肇伯飲感賦

門前橋影漾江流幾度吞聲哭故侯公子苦飢還置酒老夫向晚且停舟百年天地傾朋黨十載逋逃任馬牛漠漠

海雲連朔氣又驚初雁過吳洲

冷士喟字又喟號秋江丹徒人明諸生有江冷閣詩集

詩話秋江絕意仕進終身不入城府貧課生徒自給詩有唐音其酬唱多遺民也

寄劉令言

關河霜冷雁南游雲物淒涼屬暮秋萬里飄蓬猶作客三年戎馬更登樓艱難阮籍窮途哭憔悴江淹去國愁爲報他山搖落盡風塵惟有敝貂裘

題妙高峯

天拔一峯起波空四面開江光浮島嶼潭影浸樓臺折葦番僧渡乘槎海客來何須更壺嶠此地卽蓬萊

述懷與魏叔子

我有匣中琴皮之高石壁三年不一彈祇爲知音隔偶爾

忽逢君開囊鼓在昔上念義農人下念采薇客雅曲不須繁所貴深衷白彈罷各無言西看楚天碧

郭開泰字宗林號疊恥上海人明福王時拔貢有味諫

軒詩藁

詩話宗林以志節自勵甲申後不薙髮
蟄處以終生前吟詠皆寓忠孝之思

寄衣曲

商飈落葉如飛燕寒衣處處催鍼線征夫一去未曾還十載相思不相見相見家鄉詎有期舊衣寄盡寄新衣織成窗外三更月縫就燈前半曉雞憶昔裁衣手腕輕算來寬窄能相稱悠悠離別已多年心意商量愁未定定識腰肢舊日非翦來那得更寬圍試把妾身還自約嫁衣寬盡不相依再四丁寧寄徒侶願見兒夫親付與淚痕滴上半成

殷到日開時應認取吁嗟乎王家多難爲前驅休說封侯志尙虛又恐思家徒亂意衣間不付一封書

開歲往役海上暮春還時家更空乏賦此

勞苦三聯月還家忽暮春庶人宜往役吾道敢辭貧未得銷形影何能作隱淪桃源虛設想莫認記爲真

宮月

宮分三十六誰不是嫦娥明月知人意君王幸處多不寒飄翠袖如畫徹清歌借問長門裏逍遙步若何

韓洽字君望長洲人有寄庵詩存

詩話君望洽長之學撰篆學測解釋訓考源足證說文長箋之誤詩簡質清剛不落當時流派竹垞謂敢頑之際稱詩吳下必以君望爲巨擘

猛虎行

蘇郡故無虎比歲數獲虎云自宜興諸山渡湖而至擬古樂府作猛虎行

虎欲異羣虎舍山而渡湖自失險阻窟託身就菰蘆村落
齊戒嚴鄰保相招呼擾鉏代戈矛勇銳當先驅爪牙豈不
猛其如處世孤奮鬪亦良久力盡乃告殂錦斑斃野草割
剝無完膚嗟彼田舍兒曾非下莊徒何乃百獸尊輕身死
庸夫萬類固竝生所宅各有區一朝處非據適足亡爾軀
持此告羣虎毋若此虎愚雄長山林中賁育孰敢圖

鐵馬

急響中宵發凌空鐵騎行不知風信至頓使旅魂驚當世
正多事吾儕方苦兵那堪檐宇下又作戰場聲

錢曾字遵王常熟人

詩話遵王牧齋族孫爲牧齋注初學有學二集承緒
雲餘緒家有藏書撰讀書敏求記收藏家講板本者
不能出其範圍嘗秋夜宿破山寺賦絕句十二首牧
齋甚賞之取爲吾炙集冠尤推許琉璃簾眼二語謂

取出世間妙義寫世間感慨並題二絕句云籠眼琉璃映望奇詩中心眼幾人知思公七尺屏風上合寫吾家斷句詩高樓額粉笑如雲還鉢休隨慶喜羣大叫曾孫莫驚怖老夫原是武夷君

秋夜宿破山寺絕句

空庭月白樹陰多崖石巉巖似鉢羅莫取琉璃籠眼界舉頭爭忍見山河

晚晴簃詩匯卷十五終